


MOVIY JOMADON TASHRIFI: KITOB VA MA'RIFATGA ELCHILIK



Zebiniso KARIMOVA,

*Buxoro viloyat Vobkent tumani Axborot-
kutubxona markazining Abonement va
foydalanuvchilarga xizmat ko'rsatish xizmati
rahbari*

Hozirgi globallashuv va axborot oqimi shiddat bilan ortayotgan bir davrda yosh avlodni ma'rifat va kitobxonlikka rag'batlantirish jamiyatning eng muhim vazifalaridan biriga aylanmoqda. Zero, kitob – ma'rifat belgisi, tafakkur manbai, millatning ma'naviy boyligidir. Ana shu ezgu maqsad yo'lida O'zbekiston Respublikasi Prezidentining 2020-yil 30-oktabrdagi “Yoshlar ma'naviyatini yuksaltirish va ularning bo'sh vaqtini mazmunli tashkil etish to'g'risida”gi PF-6097-sonli farmoniga muvofiq bir qator ijobiy tashabbuslar amalga oshirilmoqda.

Shunday tashabbuslardan biri – xalqimiz ongiga ma'rifat urug'ini ekuvchi “Moviy jomadon tashrifi” loyihasidir. Ushbu loyiha aholini, avvalo, yoshlarimizni adabiyotga, kitobga yanada yaqinlashtirish, kitobxonlikni hayot tarziga aylantirish maqsadida amalga oshirilmoqda.

“Moviy jomadon tashrifi” loyihasi kitobxonlikni targ'ib qilish va aholi, ayniqsa, yoshlarni kitobga oshno etish, ularda o'qishga qiziqish uyg'otish maqsadini ko'zlaydi. Loyiha doirasida turli korxona va tashkilot-

larga, maktab, chekka qishloq hamda mahalla va madaniyat maskanlariga tashrif buyurilib, kitob targ'iboti tadbirlari o'tkaziladi.

Jomadonning ramziy ma'nosi – "ma'rifat ulashuvchi sevinch makoni" sifatida namoyon bo'ladi. Unda turli mavzulardagi kitoblar, kitobxonlikni rag'batlantiruvchi materiallar jamlanadi. Ushbu jomadonni ochish va undan kitob tarqatish jarayoni nafaqat bilim, balki hissiy ruhlantirish vazifasini ham bajaradi.

2025-yil davomida bu loyiha orqali tumanimizdagi maktablarda, chekka hududlarda, qishloq mahallalarida, yoshlar markazlarida kitob targ'iboti tadbirlari amalga oshirildi. Tashriflar davomida nafaqat kitoblar ulashildi, balki yoshlar bilan foydali suhbatlar, mualliflar bilan uchrashuvlar, she'riyat kechalari va viktorinalar tashkil etildi.

Bugungi kunda "Moviy jomadon tashrifi" faqatgina maktablar, mahallalar va madaniyat muassasalari bilan cheklanib qolmay, balki gavjum joylar – avtobus bekatlari, savdo majmualari, bozorlar hamda istirohat bog'lariga ham tashrif buyurib, aholining keng qatlamlariga kitob tarqatish va ularni ma'rifatga chorlash ishlarini amalga oshirmoqda.



Bunday joylarda kitob bilan kutilmagan uchrashuv, jamoat joyida ma'rifatni targ'ib qilish odamlarda katta qiziqish uyg'otadi. Kitob ulashilayotgan paytda yo'lovchilar, savdo rastalardagi faollar, bola-chaqali oilalar bilan qisqa, mazmunli suhbatlar tashkil etiladi. Bu esa aholining kitobga nisbatan munosabatini ijobiy tomonga o'zgartirmoqda.

"Moviy jomadon tashrifi" da yangi nashr etilgan adabiyotlarni targ'ib qilishga ham alohida e'tibor qaratiladi. Xususan, zamonaviy o'zbek va jahon adabiyotiga mansub yangi kitoblar, yosh mualliflar asarlari, bolalar va o'smirlar uchun mo'ljallangan ilmiy-ommabop risolalar, motivasion adabiyotlar "Moviy jomadon tashrifi" loyihasi orqali keng kitobxonlar ommasiga yetkazilmoqda.

Bu orqali kitobxonlar nafaqat an'anaviy, balki hozirgi kun yozuvchilari va mualliflarining ijodlari bilan

ham tanishish imkoniga ega bo'lishmoqda. Yangi kitoblar bilan amalga oshirilgan tanishuv, o'quvchilarda kitob o'qishga nisbatan yanada qiziqish uyg'otadi, ayniqsa zamonaviy muammolarni yorituvchi asarlar yoshlar qalbiga tez yetadi.

Vobkent tuman Axborot-kutubxona markazida loyiha tashkil etilgandan keyin kutubxonaga a'zo bo'lgan faol kitobxonlar soni o'rtacha 25–30 foizga oshdi. Bu esa tuman aholisi ongida ijobiy o'zgarish bo'layotganini ko'rsatadi.



Buxoro viloyatidagi Vobkent tumani Axborot-kutubxona markazida tashkil etilgan "Moviy jomadon tashrifi" loyihasi tadbirlarida 300ga yaqin aholi ishtirok etdi, 500ga yaqin badiiy va ilmiy ommaviy adabiyot tarqatildi. Ushbu tadbir doirasida yoshlarning kitobxonlik bo'yicha saviyasi aniqlandi va 20 nafar faol kitobxon maxsus sovg'alar bilan taqdirlandi.

Shuningdek, ijtimoiy tarmoqlarda loyihaning keng yoritilishi orqali aholining qiziqishi oshdi. Misol uchun, "#MoviyJomadon" xeshtegi ostida faqat 1 hafta ichida 120 dan ortiq fotoxabar tarqaldi.

Loyihaning ijtimoiy ahamiyati juda katta. Loyiha orqali kitoblar yetib borish imkoni cheklangan hududlarga bevosita ma'naviy mahsulot badiiy adabiyotlar yetkaziladi, yoshlar o'rtasida o'qish va tahlil qilish ko'nikmalari shakllanadi, jamoaviy o'qish, kitob haqida fikr almashish muhiti paydo bo'ladi, axborot va internet ta'sirida qolgan yoshlarga muqobil ma'rifat manbai yaratiladi.

"Moviy jomadon tashrifi" loyihasi ma'rifatga xizmat qiladigan o'ta muhim tashabbusdir. U aholi va kutubxona o'rtasidagi ko'prikn yanada mustahkamlaydi. Loyihaning davomiyligini ta'minlash va uni qo'llab-quvvatlash, har bir hududda "Moviy jomadon tashrifi" loyihasi tadbirlarini an'anaga aylantirish, kitobxonlikni rag'batlantiruvchi tanlov va mukofotlar tizimini kengaytirish, internet va televideniya maxsus rubrikalar tashkil etish jamiyatda mutolaa madaniyatini shakllantirish va rivojlantirishga xizmat qilishi tayin.

